

marae, me nga huihuinga tangata. Titiro ake tatou ki nga huarahi o te whakapono, katahi ano ka ata kitea te nuinga mai o nga tuunga upoko mo tena wahi mo tena wahi o nga mahi nunui o tatou haahi ahakoa he aha tona ahua. Kua tatanga te whakaaro me te huri o te ngakau ki te taha Atuatanga, he Pihopa enei kei Te Haahi Mihingare, kei Te Haahi Katorika, kei Te Haahi Tuawhitu, kei Haahi Weteriana, he Tohungatanga kei Te Haahi Momona, he Mangai kei Te Haahi Ratana, he Pihopa kei Te Haahi Ringatu me era atu Haahi Maori e tupu haere nei i roto i te iwi. He tohu katoa enei no te haere whkamuatanga o te iwi.

Kei te marama ano hoki nga whakaatu, kei te haere mai te wa e kotahi ai. Heoi te mea inaiane i ko tena haahi kei te noho tumanako kia hui mai ki tona haahi ki tona haahi.

Kua ara nei nga Kai Hautu o enei tu waka whaka-te-wairua he mea tika kia huihui ratou me kore e hui nga haahi i runga i nga kupu marama o roto i te karaipiture, hei reira kite ai te mea tohetohē, te mea pohepohe, te mea moemoea, te mea tauwhainga ki te marama noa iho o te huarahi ki te mea tika.

Kua kaumatuatia o tatou kai hautu i enei me era atu tikanga e pa ana ki te iwi nui tonu ki te tangata takitahi ranei, na reira te pai o te hui ki tetahi marae tu takawaenga, hei reira koutou, aku Toa Takitini whakapau ai i o koutou kaha, whakatakoto ai i o koutou maramatanga mo te huarahi e kotahi ai te hapai i te hoe a te iwi nui tonu me kore e kitea nga tai o Tangaroa hei whakaunga i Te Waka o Te Whakapono i te ra e whiti ana.

Kua mene nga kaumatua ki te po a ko a ratou i tumanako ai i wawta ai kaore i kitea e ratou nga hua, ahakoa te Karaipiture, Te Tiriti ranei o Waitangi, nga Mana Motuhake ranei i wawatatia ai e ratou; i te tino Mana Motuhake ngawari ranei, kaore i kitea. I mahue pea te manu i roto i te ringa, katahi ka tawhai atu ki te mea i moemoetia atu i roto i te ngahere?

Kua riro mai i nga tamariki, i nga mokopuna te ra nei. Whakamahia te morehu whenua! Hokona te taima! Piki ake i raro, me te ngakau whakaiti! Kia harikoa ai ina eke ki runga i te pae.

Koia tenei ko Te Mana Motuhake ngawari, i tino tautokona e etahi o koutou matua me o koutou tupuna. Ko tetahi wahanga i to ratou kaha ki te Mana Motuhake tuturu (Absolute). E rua enei tono e haere katoa i raro i ta ratou whaka-maoritanga i Te Tiriti o Waitangi.

I pau o ratou tino ra, o ratou tino tau ki te mounou mo tenei ahua. I haere a iwi tonu ki tena hui ki tena hui mounou ai i te wa i te kai i te moni i te whenua.

I roto i tenei ra kei te matau rawatu koutou ki o koutou